



La pbd sto sa concentrar sin la politica chantunala, naziunal gioga ella momentan nagina rolla.

FOTO CHANZLIA CHANTUNALA

Atterrament turbulent

La partida burgais-democratica sto sa fatschentar cun ses futur

DAD ANDREAS CADONAU / ANR

■ **Per la partida burgais-democratica grischuna e ses exponents nun èn ils resultads da las elecziuns fitg agreabla. Che la via da la anteriura partida populara enavos tar las ragischs democratas en il center politic na daventia simpla èn ils exponents actuals da la pbd conscients.** Il president da la partida burgais-democratica *Benno Niggli* ha gia accentuà la dumengia passada en vista dals resultads da la tscherna e la perdita dal sez en il cussegl naziunal la necessitad da stuar reponderar da rudien la preschientscha politica da la partida e da tschertgar la discussiun cun la basa. En quella direcziun è s'exprimi il timun da la fracziun da la pbd en il cussegl grond, *Gian Michael*. In-

timà da las actualas sperditas a la cumpart dal quorum d'elecziun da l'atgna partida nun è *Michael* tuttavia betg. Tantpli che la partida ha gia stuì nudar sperditas a chaschun da las elecziuns naziunalas avant quatter onns e las elecziuns da la regenza grischuna nun èn medemamain stadas signadas dad in success enorm. Il president da la fracziun è dentant conscient che la pbd ha cumenzà ses engaschi politic sco anteriura pps grischuna e politisescha oz en in auter spectrum politic. *Michael* vesa sa chapescha la necessitad da discutir senza emozziuns entaifer la partida la posiziun futura, e quai tant sin palancà naziunal, chantunal e medemamain en las regiuns. Detagls e perspectivas per quella posiziun nun ha el vuli ni pudì tradir. El ha fatg attent a la midada da generaziun dals

exponents actuals ch'en vegnids da la anteriura pps grischuna e la nova generaziun pbd. E quella nova generaziun pbd nun ha fatg talmain schletta figura a chaschun da l'elecziun da la dumengia passada. Al timun da quella glista stat *Ursin Widmer* che ha nudà suenter *Duri Campell* il secund meglier resultad, e quai sin la glista dals giuven.

Fetg bun resultat

Widmer sez nun ha betg vuli tematisar ses agen resultat, mabain quel da sia glista. El ha menziunà las bunamain 5000 vuschs recaltgadas da la glista dals giuven da la pbd e valetà quel per fitg bun. Era visavi a las autras glistas giuvnas e medemamain en il context dad elecziuns naziunalas passadas. Betg ch'il giuven politicher e

commember da la suprastanza communala da Favugn avess enorm plaschair dal resultat da sia partida. El è dentant conscient che la transformaziun da la anteriura pps grischuna tar la pbd grischuna è succedida. Fertant che la pps ha svelto pudì conquistar sia cumpart dal electorat grischun, politisescha la pbd en il centrum, e là è la concorrenza bler pli gronda. E là esì pli grev da far attent als postulats politics. *Widmer* ha regurdà a la proposta da la pbd d'avant otg onns da reformar la assicuranza per vegls e survivents. Propostas che vegnian discutadas ussa dad in tschertgel politic pli vast.

En connex cun la politica d'energia ha il giuven politicher medemamain visà a las propostas da la pbd en connex cun l'abandon da la energia nucleara. Ina rolla poli-

tica gioga la pbd suenter las elecziuns naziunalas sulet anc en ils chantuns Grischun, Glaruna e Berna. Ella turna aschidendi tar sias ragischs d'antruras en connex cun il chantun Grischun tar la anteriura partida democrata. *Widmer* vesa era schanzas en quella situaziun. El sez senz'auter s'identifitgar cun la filosofia politica da quella anteriura forza democratica s'establida en il chantun Grischun da funs ensi l'entschatta dals onns 20 dal tschentaner passà. Ed el vesa in avegnir per la pbd en il chantun Grischun. *Widmer* ha regurdà a la ferma fracziun da la pbd en il cussegl grond ed ad ina nova generaziun pronta da politisar. Il votum electoral vers sia persuna intimescha il giuven politicher era sch'el vesa anc auters impurtants aspects da la vita sper la politica.